

# 關愛的故事



## 我來自內地

我叫阿輝，廣東肇慶人，98年嚟香港。記得十年前，我同阿哥家姐喺羅湖過關嚟香港同阿爸團聚嘅時候，自己一句英文都唔識，本來喺內地讀緊高二嘅，點知落嚟香港之後要降級讀中四。我嘅理科好掂㗎，但係英文同電腦就好唔掂。好在喺暑假期間，有社會服務機構嘅義工嚟幫我補英文，不出一年，我已經讀完我平生第一本英文書。

唔好以為我喺內地嚟，就一定沉默同怕醜，我覺得做人要識得把握機會學習、唔怕嘗試、敢於面對挑戰先至得。我嘅中學生活好多姿多彩㗎，我喺中四至中六期間，喺幫過我嘅社會服務機構做義工，仲參加過好多活動，好似行山啦、露營啦，仲幫手籌備過嘉年華會。中六嗰時仲喺學校做學生會主席，策劃過籃球賽、歌唱比賽、籌款賑災等等活動，嗰時咁忙，我放學仲走去兼職做地產經紀。

我當年會考都唔錯，考到7A，而且仲包括英文科嘅，跟住我喺香港中文大學主修電子工程，畢業之後就去咗美國做咗兩年嘢。

我認為要喺一撻新嘅地方生活，就要盡量放開懷抱，認識當地嘅風土人情。我好多謝社會服務機構幫我搵學校，又幫我結識唔少同年紀、同背景嘅新移民學生。大家喺同一個起點起跑，有共通嘅語言，呢點對我嚟講好重要，因為從佢地身上，我可以學到融入新社區嘅信心同勇氣。而家，我叫自己做「中國香港人」㗎喇！

而家我27歲，開咗間地產公司，做咗「老闆」仔，生活都算過得去。不過，我好念舊㗎，如果社工姑娘叫我幫手做義工，我一定去㗎，因為我都好想幫番好似我當年人生路不熟嘅新移民，初到貴境，有人幫吓，真係容易適應好多㗎！

(617字)